

In auter sistem per adattar il tschains d'abitaziun

■ **(anr/vi) Martin Candinas giavischa da liar pli strict il tschains d'abitaziun vi dal tschains ipotecar. Il cusseglier naziunal fa attent en sia interpellaziun che cunzunt famiglias giuvnas han da schuffa da pajar l'abitaziun.** Sch'il tschains ipotecar va si reageschan ils proprietaris spert e pretendan dals locataris ladinamain dapli tschains per l'abitaziun. Sch'il tschains ipotecar va engiu n'èn ils proprietaris betg uschè speditivs. Per il solit n'adatteschan els insumma betg il tschains, nun ch'els survegnian ina dumonda en scrit. Ed anc lura sto savens in mediatu intervegnir per ch'il

proprietari sbassia propi il tschains per l'abitaziun.

«Quest sistem n'è betg gist per ils locataris», scriva Candinas en sia interpellaziun. «Tant pli che gist famiglias giuvnas pateschan adina pli fitg pervi dals auts tschains d'abitaziun en las citads ed en las aglomeraziuns.» Il politicher vul perquai savair dal cussegl federal sch'i dess pussaivladads dad obligar ils proprietaris da dar vinavant automaticamain il sbassament dal tschains. «E sche betg, tge alternativas vesa il cussegl federal per eliminar la situaziun malempernavla per ils locataris?»